

四庫全書

集部

欽定四庫全書

集部

石倉歷代詩選卷四十八

詳校官庶吉士臣范逢恩

侍讀臣孫球覆勘

總校官進士

臣朱

鈐

校對官編修

臣潘曾起

謄錄監生

臣蔣

翰

欽定四庫全書

石倉歷代詩選卷四十七

明 曹學佺 編

中唐一

錢起

字仲文
吳興人

酬王維春夜行亭贈別

山月隨客來
主人興不淺
今宵竹林下
誰覺花源遠
惆悵曙鶯啼
孤雲還絕巘

夢尋西山準上人

別處秋泉聲至今猶在耳
何嘗夢魂去不見雪山子
新月隔林時千峰翠微裏
言忘心更寂跡滅雲自起

過桐柏山

秋風過楚山山靜秋聲晚
賞心無定極仙步亦清遠
返照雲竇空寒流石苔淺
羽人昔已去靈跡欣方踐
投策謝歸途世緣從此遣

早渡伊川見舊作

鷄雞鳴早霜秋水寒旅涉漁人昔隣舍相見具舟楫出
浦興未盡向山心更愜村落通白雲茅茨隱紅葉東臯
滿時稼歸客欣復業

登秦嶺半巖遇雨

屏翳忽騰氣浮陽慘無暉千峰挂飛雨百尺搖翠微震
雷閃雲徑奔流翻石磯倚巖假松蓋臨水羨荷衣不得
采苓去空思乘月歸且憐東臯上水色侵荊扉

田園雨後贈鄰人

安排常任性偃卧晚開戶樵客荷蓑歸向來春山雨殘
雲虹未落返景霞初吐時鳥鳴村墟新泉遶林圃堯年
尚恬泊鄰里成太古室邇人遂遙相思怨芳杜

送輞川至南山寄谷口王十六

山色不厭遠我行隨處深跡幽青蘿逕思絕孤霞岑獨
鶴引遠浦鳴猿呼入林褰裳百泉裏一步一清心王子
在何處隔雲鷄犬音折麻定延佇乘月期招尋

藍田溪與漁者宿

獨遊屢忘歸況此隱淪處濯髮清冷泉月明不能去更
憐垂綸叟靜若沙上鷺一論白雲心千里滄洲趣蘆中
夜火盡浦口秋山曙歎息分枝禽何時更相遇

太子李舍人城東別業

南山轉羣木昏曉擁山翠小澤近龍居青蒼常雨氣君
家北原上千金買勝事丹闕退朝迴白雲迎賞至新晴
村落外處處煙景異片水明斷岬餘霞入古寺東臯指
歸翼目盡有餘意

谷口新居寄同省朋故

種黍傍烟溪
榛蕪無沮洳
亦知生計薄
所貴隱身處
橡栗石上材
莓苔水中路
蕭然授衣日
得此還山趣
汲井愛秋泉
結茅因古樹
閒雲與幽鳥
對我不能去
寄謝駕鷺羣
狎鷗羨所慕

酬陶六辭秩歸舊居見東

靖節昔高尚
令孫嗣清微
舊廬雲峰下
獻歲車騎歸
去俗因解綬
憶山得采薇
田疇春事起
里巷相尋稀
淵明

醉乘興閒門祇掩扉
花禽驚曙月鄰女上鳴機
畢娶願已果養恬志寧違
吾當掛朝服同爾緝荷衣

過沈氏山居

鷄鳴孤煙起靜者能卜築
喬木出雲心閒門掩山腹
貧交喜相見把臂歡不足
空林留宴言永日清耳目
泉聲冷樽俎荷氣香僮僕
往往仙犬鳴樵人度深竹
酒酣出谷口世網何羈束
始願今不從區區折腰祿

贈東隣鄭少府

一聞白雪唱願見清揚久誰謂結綬來得陪趨府後小
邑藍溪上卑棲愜所偶接宇復連牆片月亦攜手草色
同春逕鶯聲共高柳美景百花時平生一杯酒聖朝法天
地以我為芻狗秩滿歸白雲期君訪谷口

真氣重嶂裏知君嘉遁幽山階壓丹穴藥井通伏流道
者帶經出洞中攜我遊欲驂白霓去且為紫芝留忽憶
武陵事別家疑數秋

畫鶴篇省中作

點素凝姿任畫工霜毛玉羽照簾櫳借問飛鳴華表上
何如粉繒彩屏中文昌宮近芙蓉闕蘭室綢繆香且結爐
氣朝成緱嶺雲銀燈夜作華亭月日暖花明梁燕歸應
驚片雪在仙闌主人顧盼千金重誰肯徘徊五里飛

賦得青城山歌送楊杜二郎中赴蜀軍

蜀山西南千萬重仙經盡說青城峰青城嶽崙倚天碧
遠壓蛾眉吞劒壁錦屏雲起易成霞玉洞花明詎知夕
星臺二妙逐王師阮瑤軍書王粲詩日落猿聲連玉笛

晴來山翠傍旌旗
綠蘿春月營門近
知君對酒遙相思

送崔校書從軍

雁門太守能愛賢
麟閣書生亦投筆
寧惟玉劔報知己
更有龍韜佐師律
別馬連嘶出御溝
家人幾夜望刀頭
燕南春草傷心色
薊北黃雲滿眼愁
聞道輕生能擊虜
何嗟少壯不封侯

送張將軍征西

長安少年惟好武
金殿承恩爭破虜
沙場烽火隔天山

鐵騎征西幾歲還戰處黑雲霾瀚海愁中明月度陽關
玉笛聲悲離酌晚金方路極行人遠計日霜戈盡敵歸
回首戎城空落暉始笑子卿心計失徒看海上節旄稀

送崔十三東遊

千里有同心十年一會面當杯緩箏柱倏忽催離宴丹
鳳城頭噪晚鴉行人馬首夕陽斜灞上春風留別袂關
東新月宿誰家官柳依依兩鄉色誰能此別不相憶

送褚大落第東歸

離琴彈苦調美人慘向隅頃來荷策干明主還復扁舟
歸五湖漢家側席明敎久豈意遺賢在林藪玉堂金馬
隔青雲墨客儒生皆白首昨夢芳洲采白蘋歸期且喜
故園春穉子只思陶令至文君不厭馬卿貧剡中風月
久相憶池上舊遊應再得酒熟寧孤芳杜春詩成不枉
青山色念此那能不羨歸長楊諫獵事皆違他日東流
一乘興知君為我掃荆扉

效古秋夜長

秋漢飛玉霜北風掃荷香
含情紡績孤燈盡拭淚相思
寒漏長簷前碧雲靜如水
月弔棲烏啼鳥起誰家少婦
事駕機錦幕雲屏深掩扉
白玉窻中聞落葉應憐寒女
獨無衣

山齋獨坐喜玄上人夕至

舍下虎谿逕煙霞入暝開
柴門無竹靜山月與僧來
心
瑩蓮花水言忘綠茗杯
前峰曙更好斜漢欲西迴

早下江寧

暮天微雨散涼吹片帆輕雲物高秋節山川孤客情霜
蘋留楚水寒雁別吳城宿浦有歸夢愁猿莫夜鳴

登復州南樓

孤樹延春日他山捲曙霞客心湖上雁歸思日邊花行
李迷方久歸期涉歲賒故人雲路隔何處寄瑤華

和萬年成少府寓直

赤縣新秋夜文人藻思催鐘聲自仙掖月色近霜臺一
葉無螢度孤雲帶雁來明朝紫書下應問長卿才

秋夕與梁鎰文宴

客到衡門下林香蕙草時好風能自至明月不須期秋
日翻荷影晴光脆柳枝留歡美清夜寧覺曉鐘遲

題精舍寺

勝景不易遇入門神頓清房房占山色處處分泉聲詩
思竹間得道心松下生何時來此地擺落世間情

和人秋歸終南山別業

舊居三顧後晚節重幽尋野逕到門盡山窻連竹陰昔

年鶯出谷今日鳳歸林物外凌雲操誰能繼此心

下第題長安客舍

不遂青雲望愁看黃鳥飛梨花度寒食客子未春衣世事隨時變交情與我違空餘主人柳相見却依依

裴迪南門秋夜對月

夜來詩酒興月滿謝公樓影閉重門靜寒生獨樹秋鶴驚隨葉散螢遠入煙流今夕遙天永清光幾處愁

宿新里館

愁人待曉雞秋雨暗淒淒度燭螢時滅傳書雁漸低客
來知計誤夢裏泣津迷無以逃悲思寒將盡處處啼

送元評事歸山居

憶家望雲路東去獨依依水宿隨漁父山行到竹扉寒
花催酒熟山犬喜人歸遙羨書窻下千峰出翠微

送武進韋明府

理邑想無事鳴琴不下堂井田通楚越津市半漁商盧
橘垂殘雨紅蓮坼早霜送君催白首歸夢獨思鄉

送衛功曹赴荆南

漢家仍用武才子晚成名惆悵江陵去誰知魏闕情碧
雲愁楚水春酒醉宜城定想褰帷政還聞坐嘯聲

送陸郎中

事邊仍戀主舉酒復悲歌粉署含香別轅門載筆過鶯
聲出漢苑柳色過漳河相憶情難盡離居春草多

送僧歸日本

上國隨緣至來途若夢行浮天滄海遠去世法船輕水

月通禪觀魚龍聽梵聲惟憐一燈影萬里眼中明

送楊皞擢第遊江南

行人臨水去新詠復新悲萬里高秋月孤山遠別時挂
帆嚴子瀨酌酒敬亭祠歲晏無芳杜如何寄所思

送原公南遊

有意兼程去飄然二足輕故鄉多久別春草不傷情洗
鉢泉初暖焚香曉更清自知難解縛何日伴師行

送衡陽歸客

歸客愛鳴榔南征憶舊鄉江山追宋玉雲雨憶荆王醉
裏宜城近歌中郢路長憶君從此去日夕望三湘

送唐司馬赴郢州

少年從事好此去別愁輕滿坐詩人興隨君郢路行薰
葭侵驛樹雲水抱山城遙愛下車日江臯春草生

歲暇題茅茨

谷口逃名客歸來遂野心薄田供歲酒喬木卧幽禽溪
路春雲重山厨夜火深桃源應漸好仙客許相尋

酬盧十一過宿

乞還方未遂日夕望雲林
沉復逢青草何妨問素心
閉門公務散枉策故情深
遙夜他鄉宿同君梁父吟

崔十四宅問候

曉日早鶯啼江城旅思迷
微官同寄傲移疾阻招攜
遠水閭闔內青山雉堞西
王孫莫久卧春草欲萋萋

東臯早春寄郎四校書

祿微賴學稼歲起歸衡茅
窮達戀明主耕桑亦近郊
夜

來霽山雪陽氣動林梢
蘭蕙暖初吐春鳩鳴欲巢
蓬萊時入夢知子憶貧交

玉山東溪題李叟屋壁

霞景已斜照煙溪方暝投
山家歸路僻轍跡亂泉流
野老採薇暇蝸廬招客幽
麝麝突荒院鷓鴣步閒疇
偶此愜真性令人輕宦遊

南溪春耕

荷蓑趣南逕戴勝鳴條枚
溪雨有餘潤土膏寧厭開
溝

滕花落盡耒耜度雲迴誰道耦耕者仍無勝賞催日長
農有暇悔不帶經來

省試湘靈鼓瑟

善鼓雲和瑟常聞帝子靈馮夷空自舞楚客不堪聽苦
調淒金石清音入杳冥蒼梧來怨慕白芷動芳馨流水
傳瀟浦悲風過洞庭曲終人不見江上數峰青

題玉山村叟壁

谷口好泉石居人能陸沈牛羊下山小烟火隔雲深一

逕入溪色數家連竹陰藏虹辭晚雨驚隼落殘禽涉趣
皆流目將歸羨在林却思黃綬事辜負紫芝心

藥堂秋暮

隱來未得道歲去愧雲松茅屋空山暮荷衣白露濃惟
憐石苔色不染世人蹤潭靜宜孤鶴山深絕遠鐘有時
丹竈上數點綵霞重勉事壺公術仙期待赤龍

禁闥翫雪寄薛左丞

玄雲低禁苑飛雪滿神州虛白生臺榭寒光入冕旒粉

凝宮壁靜乳結洞門幽細繞迴風轉輕隨落羽浮怒濤
堆砌石新月孕簾鉤為報詩人道豐年誦聖猷

暮春過石龜谷題溫處士園林

隱几無名老何年此陸沈丘園自得性婚嫁不嬰心歲
計因山薄霞栖在谷深設置連草色曬藥背松陰觸興
雲生岫隨耕鳥下林搗頤笑來客頭上有朝簪

宿畢侍御宅

交情貧更好子有古人風晤語清霜裏平生苦節同心

惟二仲合室乃一瓢空落葉寄秋菊愁雲低夜鴻薄寒
燈影外殘漏雨聲中明發南昌去迴看御史驄

適楚次徐城

去家隨旅雁幾日到南荆行邁改鄉邑苦辛淹晦明畏
途在淫雨未晚息趨程窮木對秋館寒鷗愁古城迷津
坐為客對酒默含情感激念知己匣中孤劍鳴

閒居酬張起居見贈

在林非避世守拙自離羣弱羽謝風水窮愁依典墳良

知不遐棄新詠獨相聞能使幽興苦坐忘清景曛前山
帶喬木暮鳥連歸雲向夕野人思難忘騎省文

山下別杜少府

把手意難盡前山日漸低情人那忍別宿鳥尚同棲寸
晷戀言笑佳期欲阻睽離雲愁出岫去水咽分溪莊叟
幾虛說楊朱空自迷傷心獨歸去秋草更萋萋

夜宿靈臺寺寄郎士元

西日橫山含碧空東方吐月滿禪宮朝瞻雙頂青冥上

夜宿諸天色界中石潭倒飲蓮花水塔院空閒松栢風
萬里故人能尚爾知君視聽我心同

和李負外扈駕幸溫泉宮

未央月曉度疎鐘鳳輦時巡出九重雪霽山門迎瑞日
雲開水殿候飛龍輕寒不入宮中樹佳氣常熏仗外峰
遙羨枚臯扈仙蹕偏承霄漢渥恩濃

長信怨

長信螢來一葉秋蛾眉淚盡九重幽鵲觀前明月度

芙蓉闕下絳河流
駕衾久別難為夢
鳳管遙聞更起愁
誰分昭陽夜歌舞
君王玉輦正淹留

送李評事赴潭州使幕

湖南遠去有餘情
蘋葉初齊白芷生
謾說簡書催物役
遙知心賞緩王程
興過山寺先雲到
嘯引江帆帶月行
幕下由來貴無事
佇聞談笑靜黎甦

九日宴浙江西亭

詩人九日憐芳菊
筵客高齋宴浙江
漁浦浪花搖素壁

西陵樹色入秋窻木奴向熟懸金實桑落新開瀉玉缸
四子醉時爭講習笑論黃霸舊為邦

和王員外晴雪早朝

紫微晴雪帶恩光繞仗偏隨鴛鷺行長信月留寧避曉
宜春花滿不飛香獨看積素凝清禁已覺輕寒讓太陽
題柱盛名兼絕唱風流誰繼漢田郎

題延州聖僧穴

定力無涯不可稱未知何代坐禪僧默默山門宵閉月

熒熒石壁晝然燈四時樹長書經葉萬歲嵒懸拄杖藤
昔日捨身緣救鵲今時出見有飛鷹

寄永嘉王十二

永嘉風景別新年才子詩成定可憐夢裏還鄉不相見
天涯憶戴復誰傳花傾曉露垂如淚鶯拂遊絲斷若絃
願得回風吹海雁飛書一宿到君邊

山中酬楊補闕見過

日暖風恬種藥時紅泉翠壁薜蘿垂幽溪鹿過苔還靜

深樹雲來鳥不知青瑣同心多逸興春山載酒遠相隨
却慚身外牽纓冕未勝杯前倒接羅

江行望匡廬

咫尺愁風雨匡廬不可登祇疑雲霧窟猶有六朝僧

赴章陵訓李卿贈別

一官叨下秩九棘謝知音芳草文園路春愁滿別心

逢俠者

燕趙悲歌士相逢劇孟家寸心言不盡前路日將斜

宿洞口館

野竹通溪冷秋泉入戶鳴
亂來人不到芳草上階生

石井

片霞照仙井泉底桃花紅
那知幽石下不與武陵通

古藤

引蔓出雲樹垂綸覆巢鶴
幽人對酒時苔上閒花落

石上苔

淨與溪色連幽宜松露滴
誰知古石上不染世人跡

遠山鐘

風送出山鐘
雲霞度水淺
欲知聲盡處
鳥滅寥天遠

東陂

永日興難忘
掇芳春陂曲
新晴花枝下
愛此苔水綠

送歐陽子還江華郡

江華勝事接湘濱
千里湖山入興新
才子思歸催去棹

汀花且為駐殘春

暮春歸故山草堂

谷口春殘黃鳥稀
辛夷花盡杏花飛
始憐幽竹山窻下
不改清陰待我歸

歸雁

瀟湘何事等閒回
水碧沙明兩岸苔
二十五弦彈夜月
不勝清怨却飛來

秋夜送趙冽歸襄陽

斗酒忘言良夜深
紅螢露滴鵲驚林
欲知別後思今夕
漢水東流是寸心

過故洛城

故城門前春日斜
故城門裏無人家
市朝欲認不知處
漠漠野田空草花

九日田舍

今日吾家野興偏
東籬黃菊映秋田
浮雲暝鳥飛將盡
始到青山皓月前

石倉歷代詩選卷四十七

欽定四庫全書

石倉歷代詩選卷四十八

明 曹學佺 編

中唐二

劉長卿

字文房
河間人

題王少府堯山隱處簡陸鄱陽

故人滄洲吏深與世情薄解印二十年委身在丘壑買
田楚山下妻子自耕鑿羣動心有營孤雲本無着因收

谿上釣遂接林中酌對酒春日長山村杏花落

晚次湖口有懷

靄然空水合目極平江暮南望天無涯孤帆落何處頃
為衡湘客頗見湖山趣潮氣和楚雲夕陽映江樹帝鄉
勞想望萬里心來去白髮生扁舟滄波滿歸路秋風今
已至日夜雁南度木葉辭洞庭紛紛落無數

陪元侍御遊支硎山寺

支公去已久寂寞龍華會古木閉空山蒼然暮相對林巒非

一狀水石有餘態密竹藏晦明羣峰爭向背香氣空翠中猿聲暮雲外留連南臺客想像西方內因逐溪水還觀心兩無礙

夕次檐石湖夢洛陽親故

天涯望不盡日暮愁獨去萬里雲海空孤帆向何處寄身烟波裏頗得湖山趣江氣和楚雲秋聲亂楓樹如何異鄉縣日復懷親故遙與洛陽人相逢夢中路不堪明月裏更值清秋暮倚棹對滄波歸心共誰語

負謫後登于越亭作

天南愁望絕亭上柳條新落日獨歸鳥孤舟何處人生
涯投越徼世業陷胡塵杳杳鍾陵暮悠悠鄱水春秦臺
悲白首楚澤怨青蘋草色迷征路鶯聲傍逐臣獨醒空
取笑直道不容身得罪風霜苦全身天地仁青山數行
淚滄海一窮鱗牢落機心盡惟憐鷗鳥親

留題李明府雲溪水堂

寥寥此堂上幽意復誰論落日無王事青山在縣門雲
峰向高枕漁釣入前軒晚竹踈簾影春苔雙履痕荷香

隨坐卧湖色映晨昏
虛牖閒生白鳴琴靜對言
暮禽飛上下春水帶清渾
遠岫誰家柳孤煙何處村
謫居投瘴癘離思過湘沅
從此扁舟去誰堪江浦猿

禪智寺上方懷演和尚寺即和尚所創

絕巘東林寺高僧惠遠公
買園隋苑下持鉢楚城中
斗極千燈近煙波萬井通
遠山低月殿寒木露花宮
紺宇焚香淨滄洲擺霧空
雁來秋色裏龍起早潮東
飛錫今何在蒼生待發蒙
白雲翻送客庭樹自辭風
捨筏追開

士迴舟狎釣翁平生江海意惟共白鷗同

奉陪蕭使君入鮑達洞尋靈山寺

山居秋更鮮秋江相映碧獨尋滄洲路如待挂帆客遂
使康樂侯披榛着雙屐入雲開嶺道永日尋泉脉古寺
隱青冥空中寒磬夕蒼苔絕行徑飛鳥去無迹樹杪下
歸人水聲過幽石任情趣愈遠移步奇屢易蘿木靜漂
濛風煙深寂寂徘徊未能去畏共桃源隔

孫權故城下懷古無送友人歸建業

雄圖爭割據神器終不守上下武昌城長江竟何有古
來壯臺榭事往悲陵阜寥落幾人家猶依數株柳威靈
絕想像蕪沒空林藪野徑春草中郊扉夕陽後逢君從
此去背楚方東走烟際拍金陵潮時過湓口行人已何
在臨水徒揮手惆悵不能歸孤帆沒雲久

京口懷洛陽舊居兼寄廣陵二三知己

川闊悲無梁靄然滄波夕天涯一飛鳥日暮南徐客氣
混京口雲潮吞海門石孤帆候風進夜色帶江白一水

阻佳期相望空脉脉那堪歲方盡更使春夢積故國胡
塵飛遠山楚雲隔家人想何在庭草為誰碧惆悵祇傷
情滄浪有餘跡嚴陵七里灘攜手同所適

雨中登沛縣樓贈表兄郭少府

楚澤秋更遠雲雷有時作晚陂帶殘雨白水昏漠漠佇
立收烟氛洗然靜東郭卷簾高樓上萬里看日落為客
頻改火辭家尚如昨小邑務常閒吾兄宦何薄高標青
雲器獨立滄江鶴惠愛原上情殷勤丘中諾何當遂良

願歸卧青山郭

對雨贈濟陰馬少府考城蔣少府兼獻成武五
兄

繁雲兼家思彌望連濟北日暮微雨中州城帶秋色蕭
條主人靜落葉飛不息鄉夢寒更頻蟲聲夜相逼二賢
縱橫器久滯賢勞職笑語和風騷雍容事文墨吾兄即
時彥前路良未測秋水百丈清寒松一枝直此心欲引
託誰為生羽翼且復頓歸鞍杯中雪胸臆

吳中間潼關失守因奉寄淮南蕭判官

一雁飛吳天羈人傷暮律松江風嫋嫋波上片帆疾木落
姑蘇臺霜收洞庭橘蕭條長洲外惟見寒山出胡馬嘶
秦雲漢兵亂相失關中因竊據天下共憂慄南楚有瓊
枝相思怨瑤瑟一身寄滄洲萬里看白日赴敵甘負戈
論兵勇投筆臨風但攘臂擇木時委質不如歸遠山雲
卧飯松栗

奉使新安自桐廬縣經嚴陵釣臺宿七里灘下

寄使院諸公

悠然釣臺下懷古時一望江水自潺湲行人獨惆悵新
安從此始桂楫方蕩漾連岷去不斷對嶺遙相向夾岨
黛色愁沈沈綠波上夕陽連古木水鳥拂寒浪月下扣
船聲煙中采菱唱猶憐負羈束未暇依清曠牽役徒自
勞近名非所尚何時故山裏却醉松花釀回首惟白雲
孤舟復誰訪

題武侯寺

青林武丘寺林際翠微路仰見山僧來遙從飛鳥處茲
峰論寶玉千載惟丘墓埋劍人空傳鑿山龍已去捫蘿
披翳蒼路轉夕陽遽虎嘯崖谷寒猿鳴山松暮徘徊北
樓上江海窮一顧日映千里帆鷗歸萬家樹暫因懷所
適果得捐外慮庭暗樓間雲簷香滴甘露久迷空寂理
多為繁華故永欲投死生餘生豈能誤

奉餞鄭中丞罷浙西節度還京

天上移將星元戎罷龍節三軍含怨慕橫吹聲斷絕五

馬嘶城隅萬人卧車轍滄洲浮雲暮杳杳去帆發迴首
不問家歸心遙向闕煙波限吳楚日夕事淮越弔影失
所依側身随下列孤蓬飛不定長劍光未滅綠綺為誰
彈紅芳堪自擷悵然江南春獨此湖山月千里懷去思
百憂變華髮頌聲滿江海今古流不竭

送裴四判官赴河西軍試

吏道豈易愜如君誰與儔逢時將騁驥臨事無金牛鮑
叔幸相知田蘇頗同遊英資挺孤秀清論含古流出塞

卷四十八
佐持簡辭家擁鳴馬勅憲臺貴公舉幕府資良籌武士佇
明試皇華難久留陽臺望天盡洮水令人愁萬里看一鳥
曠然煙霞收晚花對古戍春雪含邊州道路雖暫隔音
塵那可求他時相望處明月西南樓

旅次丹陽郡遇康侍御宣慰召募兼別岑單父
客心暮千里回首煙花繁楚水度歸夢春江連故園羈
人懷上國驕虜窺中原胡馬暫為害漢臣多負恩羽書
晝夜飛海內風塵昏雙鬢日已白孤舟心且論繡衣從

北來汗馬宣王言憂憤激忠勇悲歡動黎元南徐爭赴
難發卒如雲屯倚劒看太白洗兵臨海門故人亦滄洲
少別堪傷魂積翠下京口歸潮落山根如何天外帆又
此波上樽空令憶君處鶯聲催淚痕

奉和李大夫同呂評事太行苦熱行兼寄院中
諸公仍呈王員外

迢遞太行路自古稱險惡千騎儼欲前羣峰望如削火
雲從中出仰視飛鳥落汗馬卧高原危旌倚長薄清風

竟不至赤日何煎鑠九重今旰食萬里傳明畧諸將候
軒東元兇愁鼎鑊何勞短兵接自有長纓縛通越事豈
難渡瀘功未博朝辭羊腸坂夕望貝丘郭漳水斜遶營
常山遙入幕永懷姑蘓下却寄建安作白雪和難成滄
波意空託

罷攝官後將還舊居留辭李侍御

江海今為客風波失所依白雲心已負黃綬計仍非累
辱羣公薦頻霑一尉微去緣焚玉石來豈采葑菲州

縣名何在漁樵事亦違故山桃李月初服薜蘿衣熊軾
分朝寄龍韜解賊圍風謠傳吏體雲物助兵威草映旂
營綠花臨檄羽飛全吳爭轉戰狂虜怯知機憶昨趨金
節臨時廢玉徽俗流應不厭靜者或相譏世難慵干謁
時閒喜放歸潘郎悲白髮謝客愛清輝樗散材因棄交
親跡已稀獨愁看五柳無事掩雙扉

早春贈別趙居士還江左時長卿下第歸嵩陽

舊居

見君風塵裏意出風塵外自有滄洲期含情十餘載深
居鳳城曲日預龍華會果得僧家緣能遺俗人態一身
今已適萬物知何愛悟法雷已空看心水無礙且將窮
妙理兼欲尋勝槩放舟馳楚邦負杖辭秦塞目送南飛
雲令人想吳會遙思舊遊處髣髴疑相對夜火金陵城
春煙石頭瀨滄波極天末萬里明如帶一片孤客帆飄
然向青靄楚天合江氣雲色常霽霽對隱見湖中山相連
數州內顧余尚羈束何幸承眄睐素願徒自勤清機本

難逮獲落名不成徘徊意空大逢時雖貴達守道甘易
退逆旅鄉夢頻春風客心碎別君日已遠離念無明晦
予亦返柴荆山田事耕耒

湘中紀行五首

山色無定姿如煙復如黛孤峰夕陽後翠嶺秋天外雲
起遙蔽虧江迴頻向背不知今遠近到處猶相對

右秋雲嶺

江楓日搖落轉愛寒潭靜水色淡如空山光復相映人

閒性更慢魚戲波難定楚客時往來偏知白鷗性

右花石潭

前山帶秋色獨往秋江晚疊嶂入雲多孤峰去人遠
黃緣不可到蒼翠空在眼渡口問漁家桃源路深淺

右石圍峰

秋月照瀟湘月明聞盪槳石橫晚瀨急水落寒沙廣
衆嶺猿嘯重空江人語響清暉朝復暮如待扁舟賞

右浮石瀨

空傳古岼下曾見蛟龍去秋水晚沈沈獨疑在何處亂
聲沙上石倒景雲中樹獨見一扁舟樵人橫欲渡

右橫龍灘

雜詠五首上禮部李侍郎

月色滿軒白琴聲宜夜闌颺颺青絲上靜聽松風寒古
調雖自愛今人多不彈向君投此曲所貴知音難

右幽琴

四月深澗底桃花方欲然寧知地勢下遂使春風偏此

意頗堪惜無言誰為傳過時君未賞空媚幽林前

右晚桃

玄黃一疲馬筋力盡胡塵驤首北風夕徘徊鳴向人誰
憐棄置久却與駑駘親猶戀長城外青青寒草春

右疲馬

寶鏡臨曙開含虛淨如水獨懸秦臺上萬象清光裏豈
慮高鑒偏但妨流塵委不知娉婷色回照今何似

右春鏡

向夕燈稍進空堂彌寂寞光寒對愁人時復一花落但
恐明見累何愁暗難託戀君秋夜永無使蘭膏薄

右寒缸

寄李侍御

舊國人未歸芳洲草還碧年年湖上亭悵望江南客驄
馬入關西白雲獨何適相思煙水外惟有心不隔

晚泊湘江懷故人

天涯片雲去遙指帝鄉憶惆悵增暮情瀟湘復秋色扁

舟宿何處落日羨歸翼萬里無故人江鷗不相識

從軍三首

目極雁門道青青邊草春一身事征戰匹馬同辛勤末
路成白首功歸天下人

倚劍白日暮望歸登戍樓北風吹羌笛此夜關山愁回
首不無意滹河空自流

黃沙一萬里白首無人憐報國劍已折歸鄉身幸全單
于古臺下邊色寒蒼然

龍門八詠

秋山日搖落秋水急波瀾獨見魚龍氣長令煙雨寒誰
窮造化力空向兩崖看

右關口

山葉傍崖赤千峰秋色多夜泉發清響寒渚生微波稍
見沙上月歸人爭渡河

右水東渡

寂寞對伊水經行長未還東流自朝暮千載空雲山誰

見白鷗鳥無心洲渚間

右福公塔

松路向精舍花龕歸老僧
閒雲隨錫杖落日低金繩
入夜翠微裏千峰明一燈

右遠公龕

隱隱見花閣隔河映青林
水田秋雁下山寺夜鐘深
寂冥羣動息風泉清道心

右石樓

誰知往來意孤雲長自閒風寒未渡水日暮更看山木
落衆峰出龍宮蒼翠間

右下山

伊水搖鏡光纖鱗如不隔千龕道傍古一鳥沙上白何
事還山雲能留向城客

右水西渡

日暮下山來千峰暮鐘發不知波上棹還弄山中月伊
水連白雲東南遠明滅

右渡水

惠福寺與陳留諸官茶會

到此機事遣自嫌
塵網迷因知萬法幻
盡與浮雲齊
疎竹映高枕
空花隨杖藜
香飄諸天外
日隱雙林西
傲吏方見狎
真僧幸相攜
能令歸客意
不復還東溪

金陵西泊舟臨江樓

蕭條金陵郭
舊是帝王州
日暮望鄉處
雲邊江樹秋
楚雲不可託
楚水只堪愁
行客千萬里
滄波朝暮流
迢迢

洛陽夢獨卧青川樓異鄉共如此孤帆難久遊

石梁湖寄陸兼

故人千里道滄波十年別夜上明月樓相思楚天濶瀟
瀟清秋暮嫋嫋涼風發湖色淡不流沙鷗遠還滅煙波
日已遠音問日已絕歲晏含空情江皋綠芳歇

送沈少府之任淮南

惜君滯南楚枳棘徒棲鳳獨與千里帆春風遠相送此
行山水好時物亦應衆一鳥飛長淮百花滿雲夢相期

丹霄路遙聽清風頌勿為州縣卑時來自為用

宿懷仁縣南湖寄東海荀處士

向夕斂微雨晴開湖上天離人正惆悵新月愁嬋娟佇
立白沙曲相思滄海邊浮雲自來去此意誰能傳一水
不相見千峰隨客船寒塘起孤雁夜色分鹽田時復一
延首憶君如眼前

南楚懷古

南國久蕪沒我來空鬱陶君看章華宮處處生蓬蒿但

見陵與谷豈知賢與豪精魂托古木寶劍捐江臯倚棹
下晴景回舟隨晚濤碧雲暮寥落湖上秋天高往事那
堪問此心徒自勞獨餘湘水上千載間離騷

杪秋洞庭中懷卞道士謝太虛

漂泊日復日洞庭今更秋白雲如有意此夜催人愁惆
悵客中月徘徊江上樓心知楚天遠目送滄浪流羽客
久已沒微言無處求空餘白雲在容與隨孤舟千里杳
難望一身當獨遊故園復何許江海徒淹留

潁川留別司倉李萬

故人早負千將器，誰言未展平生思。
想君疇昔高步時，肯料如今折腰事。
且知投刃皆若虛，日揮案牘常有餘。
槐暗公門趨小吏，荷香陂水膾鱸魚。
客裏相逢款話深，如何岐路剩霑襟。
白雲西上催歸念，潁水東流是別心。

聽笛歌

舊遊憐我長沙謫，載酒沙頭送遷客。
天涯望月自沾衣，江上何人復吹笛。
橫笛能令孤客愁，淶波澹澹如不流。

商聲寥亮羽聲苦江天寂歷江楓秋靜聽關山同一叫
三湘月色悲猿嘯又吹楊柳激繁音千里春色傷人心
隨風飄向何處落惟見曲盡平湖深明發與君離別後
馬上一聲堪白首

時平後送范倫歸安州

昨聞戰罷圖麟閣破虜收兵捲戎幕滄海初看漢月明
紫微已見胡星落憶昔扁舟此南渡荊棘煙塵滿歸路
與君攜手姑蘇臺望鄉一日登幾回白雲飛鳥去寂寞

吳山楚岫空崔嵬事往時平還舊丘
青青春草近家愁
洛陽舉目今誰在潁水無情應自流
萬里遙懸帝鄉憶
五年空帶風塵色却到長安逢故人不道姓名應不識

疲兵篇

驕虜乘秋下薊門深山日夕煙塵昏
三軍疲馬力已盡
百戰殘兵功未論陣雲泱泱屯塞北
羽書紛紛來不息
孤城望處爭斷腸折劍看時可霑臆
元戎日夕且歌舞
不念關山久辛苦自矜倚劍氣凌雲
却笑聞笳淚如雨

萬里飄飄空此身十年征戰老胡塵赤心報國無片賞
白首還家有幾人朔風蕭蕭動枯草旌旗獵獵榆關道
漢月何曾照客心胡笳只解催人老軍前仍欲破重圍
閨裏猶應愁未歸小婦十年啼夜織行人九月憶寒衣
飲馬滹河晚更清行吹羌笛遠歸營只恨漢家多苦戰
徒遺金鏃滿長城

新安送陸澧歸江陰

新安路人來去早潮復晚潮明日知何處潮水無情亦

解歸自憐長在新安住

明月灣尋賀九不遇

楚水日夜綠
傍江春草滋
青青遙滿目
萬里傷心歸
故人川上復
何之
明月灣南空
所思故人不在
明月在誰見
孤舟來去時

入桂渚次砂牛石穴

扁舟傍歸路
日暮瀟湘深
湘水清見底
楚雲澹無心
片帆落桂渚
獨夜依楓林
楓林月出猿
聲苦
桂渚天寒桂

花吐此中無處不堪愁江客相看淚如雨

嚴陵釣臺送李康成赴江東使

潺湲子陵瀨髣髴如在目七里人已非千年水空綠新
安江上孤帆遠應逐楓林萬餘轉古臺落日共蕭條寒
水無波更清淺臺上漁竿不復持却令猿鳥向人悲灘
聲山翠至今在遲爾行舟晚泊時

送姨子弟往南郊

一展慰踈闊寸心仍未伸別時兩童穉及此俱成人那堪

適會面遽已悲分手客路向楚雲河橋半哀柳送君匹
馬別河橋汝南山郭寒蕭條今我單車復西上遙望灞
陵轉惆悵何處共傷離別心明月亭亭兩鄉望

銅雀臺

嬌愛更何日高臺空數層含啼映雙袖不忍省西陵漳
河東流無復來百花輦路為蒼苔青樓月夜長寂寞碧
雲日暮空徘徊君不見鄴中萬事非昔時古人不在今
人悲春風不逐君王去草色年年舊宮路宮中歌舞已

浮雲空指行人往來處

王昭君歌

自矜嬌豔色不顧丹青人那知粉繪能相負却使容華
翻誤身上馬辭君嫁驕虜玉顏對人啼不語北風雁急
浮雲秋萬里獨見黃河流纖腰不復漢宮寵雙蛾長向
胡天愁琵琶絃中苦調多蕭蕭羌笛聲相和誰憐一曲
傳樂府能使千秋傷綺羅

江樓送太康郭主簿赴嶺南

對酒憐君安可論當官愛士如平原料錢用盡却為謗
食客空多誰報恩萬里孤舟向南越蒼梧雲中暮帆滅
樹色應無江北秋天涯尚見淮陽月驛路南隨桂水流
猿聲不絕到蠻州青山落日那堪望誰見思君江上樓

客舍喜鄭三見寄

客舍逢君未換衣閉門愁見桃花飛遙想故園今已爾
家人應念行人歸寂寞垂楊映深曲長安日暮靈臺宿
窮巷無人鳥鵲閒空庭新雨莓苔綠此中分與故交疎

何幸仍迴長者車十年未稱平生意好得辛勤謾讀書
送賈三北遊

賈生未遇猶窘迫身馳匹馬邯鄲陌片雲郊外朝送人
斗酒城邊暮留客顧余他日仰時髦不堪此別相思勞
雨色新添漳水綠夕陽遠照蘓門高把袂相看衣共緇
窮愁只是惜良時亦知到處逢下榻莫滯秋風西上期
雨中過員稷巴陵山居贈別

憐君洞庭上白髮向人垂積雨悲幽獨長江對別離牛

羊歸故道猿鳥聚寒枝明發遙相望雲山不可知

送李中丞之襄州

流落征南將曾驅十萬師罷歸無舊業老去戀明時獨
立三朝重輕生一劍知茫茫漢江上日暮復何之

奉使至申州傷經陷沒

舉目傷蕪沒何年此戰爭歸人失舊里老將守孤城廢
戍山煙出荒田野火行獨憐淝水上時亂亦能清

穆陵關北逢人歸漁陽

逢君穆陵路匹馬向桑乾
楚國蒼山古幽州白日寒
城池百戰後耆舊幾家殘
處處蓬蒿徧歸人掩淚看

步登夏口古城作

平蕪連古堞遠客此沾衣
高樹朝光上空城秋氣歸
微明漢水極搖落楚人稀
但見荒郊外寒鷗暮暮飛

酬郭夏人日長沙感懷見贈

舊俗歡猶在憐君恨獨深
新年向國淚今日倚門心
歲去隨湘水春生近桂林
流鶯且莫弄江畔正行吟

餘干旅舍

搖落暮天迴青楓霜葉稀孤城向水閉獨鳥背人飛渡
口月初上隣家漁未歸鄉心正欲絕何處搗寒衣

登思禪寺題脩竹茂松

上方幽且暮臺殿隱蒙籠遠磬秋山裏清猿古木中衆
溪連竹路諸嶺共松風儻許棲林下甘成白首翁

恩勅重推使牒追赴蘇州次前溪館作

漸入雲峰裏愁看驛路閒亂鴉投落日疲馬向空山且

喜憐非罪何心戀末班天南一萬里誰料得生還

將赴江南湖上別皇甫曾

此去君何恨南行我更遙東西湖渺渺離別雨瀟瀟綠
水通春谷青山過板橋潯陽如枉棹千里有歸潮

秋日登吳公臺上寺遠眺寺即陳將吳明徹戰

場

古臺搖落後秋日望鄉心野寺來人少雲峰隔水深夕
陽依舊壘寒磬滿空林惆悵南朝事長江獨至今

送崔昇歸上都

舊寺尋遺緒歸心逐去塵
早鶯何處客古木幾家白人白
髮經多難滄洲欲暮春
臨期數行淚為爾一沾巾

送王端公入奏赴上都

舊國無家訪臨岐亦羨歸
途經百戰後客過二陵稀
秋草通征騎寒城背落暉
行當蒙顧問吳楚歲頻飢

送營田判官鄭侍御赴上都

上國三千里西還及歲芳
故山經亂在春日送歸長曉

奏趨雙闕秋成報萬箱幸論開濟力已實海陵倉

清明後登城眺望

風景清明後雲山睥睨前百花如舊日萬井出新烟草
色無空地江流合遠天長安在何處遙指夕陽邊

陪王明府泛舟

花縣彈琴暇樵風載酒時山含秋色近鳥度夕陽遲出
沒鳬成浪蒙籠竹亞枝雲峰逐人意來去解相隨

晚次苦竹館却憶于越舊遊

卷四十八
匹馬風塵色千峰旦暮時遙看落日盡獨向遠山遲故
驛花臨道荒村竹映籬誰憐却回首步步戀南枝

送李二十四移家之江州

煙塵猶滿目岐路易沾衣逋客多南渡征鴻自北飛九
江春草綠千里暮潮歸別後難相訪全家隱釣磯

送盧判官南湖

漾舟仍載酒愧爾意相寬草色南湖綠松聲小署寒水
禽前後起花嶼往來看已作滄洲調無心戀一官

贈西隣盧少府

籬落能相近漁樵偶復同
苔封三徑絕溪向數家通
犬吠寒煙裏鴉鳴夕照中
時因杖藜次相訪竹林東

移使鄂州次峴陽館懷惟舊居

多慙恩未報敢問路何長
萬里通秋雁千峰共夕陽
舊遊成遠道此去更違鄉
草露深山裏朝朝落客裳

更被奏留淮南送從弟罷使江東

又作淮南客還悲木葉聲
寒潮落底步秋色上蕪城
王

事何時盡滄洲羨爾行青山將綠水惆悵不勝情

經漂母墓

昔賢懷一飯茲事已千秋古墓樵人識前朝楚水流渚
蘋行客薦山木杜鵑愁春草茫茫綠王孫舊此遊

答舍弟之鄱陽居

鄱陽寄家處自別掩柴扉故里何人在滄波孤客稀湖
山春草徧雲木夕陽微南去逢迴雁應憐相背飛

過桃花夫人廟

寂寞應千歲桃花想一枝
路人看古木江月向空祠
雲雨飛何處山川是舊時
獨憐春草色猶似憶佳期

過湖南羊處士別業

杜門成白首湖上寄生涯
秋草蕪三徑寒塘獨一家
鳥歸村落盡水向縣城斜
自有東籬菊年年解作花

送齊郎中典括州

星象移何處旌麾獨向東
勸耕滄海畔聽訟白雲中
樹色雙溪合猿聲萬嶺同
石門康樂在幾里枉帆通

送少微上人遊天台

石橋人不到獨往更迢迢
乞食山家少尋鐘野路遙
松門風自掃瀑布雪難消
秋夜聞清楚餘音逐海潮

却歸睦州至七里灘下作

南歸猶謫宦獨上子陵灘
江樹臨洲晚沙禽對水寒
山開斜照在石淺亂流難
惆悵梅花發年年此地看

新年作

鄉心新歲切天畔獨潛然
老至居人下春歸在客先
嶺

猿同旦暮江柳共風煙已似長沙傳從今又幾年

送裴郎中貶吉州

亂軍交白刃一騎出黃塵漢節同歸闕江帆共逐臣猿
愁岐路晚梅作異方春知己鄴侯在應憐脫粟人

送李使君貶連州

獨過長沙去誰憑此路愁秋風散千騎寒雨泊孤舟賈
誼辭明主蕭何識故侯漢廷當自召湘水但空流

喜鮑禪師自龍山至

故居何日下春草欲芊芊猶對山中月誰聽石上泉猿
聲知後夜花發見流年杖錫間來往無心到處禪

送方外上人之常州依蕭使君

宰臣思得度鷗鳥戀為羣遠客迴飛錫空山卧白雲夕
陽孤艇去秋水兩溪分歸共臨川史同翻貝葉文

和州留別穆郎中

播遷悲遠道搖落感衰容今日猶多難何年更此逢世
交黃葉散鄉路白雲重明發看烟樹惟聞江北鐘

酬秦系

鶴書猶不省那出白雲來舊路經年別寒潮每日迴家
空歸海燕人老發江梅最憶門前柳閒居手自栽

送朱山人越州賊退後歸山陰別業

越州初罷戰江上送歸橈南渡無來客西陵自落潮空
城垂故柳舊業廢春苗閭里相逢少鶯花共寂寥

過前安宜張明府郊居

寂寥東郭外白首一先生解印孤琴在移家五柳成夕

陽臨水釣春雨向田耕終日空林下何人識此情

使迴次柳楊過元八所居

君家楊柳渡來往落帆過綠竹經寒在青山欲暮多薜蘿誠可戀婚嫁復如何無奈閒門外漁翁夜夜歌

逢郴州使因寄鄭協律

相思楚天外夢寐楚猿吟更落淮南葉難為江上心衡陽問人遠湘水向君深欲逐孤帆去茫茫何處尋

自岳陽却歸鄂州使院留別鄭洵侍御先曾謫

居此州

何事長沙謫相逢楚水秋
暮帆歸夏口寒雨對巴丘
帝子椒漿奠騷人木葉愁
誰憐萬里外離別洞庭頭

碧澗別野喜皇甫侍御相訪

荒村帶返照落葉亂紛紛
古路無行客寒山獨見君
野橋經雨斷澗水向田分
不為憐同病何人到白雲

初到碧澗招明契上人

漸老知身累初寒曝背眠
白雲留永日黃葉減餘年
猿

護窻前樹泉澆谷後田沃洲能共隱不用道林錢

夏口送徐郎中歸朝

星象南宮遠風流上客稀九重思曉奏萬里見春歸棹
發空江響城孤落日暉離心與楊柳臨水更依依

鄂渚聽杜別駕彈胡琴

丈姬留此曲千載一知音不解胡人語空留楚客心聲
隨邊草動意入隴雲深何事長江上蕭蕭出塞吟

送南特進歸行營

聞道軍書至揚鞭不問家
虜雲連白草漢月到黃沙
汗馬河源飲燒羌隴坻遮
翩翩新結束去逐李輕車

送道標上人歸南岳

悠然倚孤棹却憶卧中林
江草將歸遠湘山獨往深
白雲留不住綠水去無心
衡岳千峰亂禪房何處尋

送蔡侍御赴上都

遲遲立駟馬久客戀瀟湘
明日誰同路新年獨到鄉
孤烟向驛遠積雪去關長
秦地看春色南枝不可忘

春過裴虬郊園

郊原春欲暮，桃杏落紛紛。
何處隨芳草，留家寄白雲。
聽鶯情念友，看竹恨無君。
長嘯高臺上，南風冀雨聞。

海鹽官舍早春

小邑滄洲吏，新年白首翁。
一官如遠客，萬事極飄蓬。
柳色孤城裏，鶯聲細雨中。
羈心早已亂，何事更春風。

松江獨宿

洞庭初下葉，孤客不勝愁。
明月天涯夜，青山江上秋。
一

官成白首萬里寄滄洲久被浮名繫能無愧海鷗

送行軍張司馬罷使回

時危身赴敵事往任浮沈末路三江去當時百戰心
春風吳苑綠古木剡山深千里滄波上孤舟不可尋

喜李翰自越至

南浮滄海上萬里到吳臺久別長相憶孤舟何處來
春風催客醉江月向人開羨爾無羈束沙鷗猶不猜

長門怨

何事長門閉珠簾祇自垂月移深殿早春向後宮遲蕙
草生閒地梨花發舊枝芳菲自恩幸着着被風吹

送李校書適越謁杜中丞

江風處處盡旦暮水空波搖落行人去雲山向越多陳
蕃懸榻待謝客枉帆過相見耶溪路逶迤入薜蘿

尋南溪常山道人隱居

一路經行處莓苔見履痕白雲依靜渚春草閉閒門過
雨看松色隨山到水源溪花與禪意相對亦忘言

楊州雨中張十宅觀妓

夜色帶春烟，燈花拂更然。
殘妝溼石黛，豔舞落金鈿。
掩笑頻歌扇，迎歌乍動絃。
不知巫峽雨，何事海西邊。

餞別王十一南遊

望君煙水濶，揮手淚沾巾。
飛鳥沒何處，青山空向人。
長江一帆遠，落日五湖春。
誰見汀洲上，相思愁白蘋。

雲門寺訪靈上人

所思勞日夕，惆悵去西東。
禪客知何在，春山到處同。
獨

行殘雪裏相見白雲中請近東林寺窮年事遠公

送韓司直

遊湖還入越來往任風波復送王孫去其如春草何
明殘雪在潮滿夕陽多季子留遺廟停舟試一過

送人遊越

未習風波事初為吳越遊露霑湖岬曉月照海營
秋梅市門何在蘭亭水尚流西陵待潮處落日滿
航舟

送康判官往新安

不向新安去那知江路長
猿聲近廬霍水色勝瀟湘
驛路收殘雨漁家帶夕陽
何須愁旅泊使君有輝光

九日登李明府北樓

九日登高望蒼蒼遠樹低
人煙湖草裏山翠縣樓西
霜降鴻聲切秋深客思迷
無勞白衣酒陶令自相攜

同諸公登樓

秋草行將暮登樓客思驚
千家同霽色一雁報寒聲
北望無鄉信東遊滯客行
令君佩銅墨還有越鄉情

送張判官罷使東歸

白首辭知己滄洲憶舊居
落潮迴野艇積雪卧官廬
范叔寒猶在周王歲欲除
春山數畝地歸去帶經鋤

湘妃廟

荒祠古木暗寂寂此江濱
未作湖南雨知為何處雲
苔痕斷珠履草色帶羅裙
莫唱迎仙曲空山不可聞

斑竹巖

蒼梧在何處斑竹自成林
點點留殘淚枝枝寄此心
寒

山響易滿秋水影偏深
欲覓樵人路蒙龍不可尋

洞山陽

舊日仙成處荒林客到稀
白雲將犬去芳草任人歸
空谷無行徑深山少落暉
桃園幾家住誰為掃荆扉

赤沙湖

茫茫葭葦外一望一沾衣
秋水連天濶潯陽何處歸
沙鷗橫暮雪川日動寒暉
楚客來相問孤舟泊釣磯

獻淮寧軍節度李相公

建牙吹角不聞喧三十登壇衆所尊
家散萬金酬死士身留一劍答君恩
漁陽老將多迴席魯國諸生半在門
白馬翩翩春草綠卽陵西去獵平原

觀校獵上淮西相公

龍驤校獵卽陵東野火初燒楚澤空
師事黃公千載後身騎白馬萬人中
笳隨晚吹吟邊草箭沒寒雲落塞鴻
三十擁旄誰不羨周郎少小立奇功

送皇甫曾赴上都

東遊久與故人違
西去荒涼舊路微
秋草不生三徑處
行人獨向五陵歸
離心日遠如流水
迴首川長共落暉
楚客豈勞傷此別
滄江欲暮自沾衣

送李錄事兄歸襄鄧

十年多難與君同
幾處移家逐轉蓬
白首相逢征戰後
青春已過亂離中
行人杳杳看西月
歸馬蕭蕭向北風
漢水楚雲千萬里
天涯此別恨無窮

漢陽獻李相公

退身高卧楚城幽獨掩閒門漢水頭春草雨中行徑沒
暮山江上捲簾愁幾人猶憶孫弘閣百口同乘范蠡舟
早晚却還丞相印十年空被白雲留

長沙過賈誼宅

三年謫宦此樓遲萬古惟留楚客悲秋草獨尋人去後
寒林空見日斜時漢文有道恩猶薄湘水無情弔豈知
寂寂江山搖落處憐君何事到天涯

登餘干古縣城

孤城上與白雲齊萬古荒涼楚水西官舍已空秋草綠
女牆猶在夜烏啼平沙渺渺行人度落日亭亭向客低
沙鳥不知陵谷變朝來暮去弋陽溪

將赴嶺外留題蕭寺遠公院

竹房遙閉上方幽苔徑蒼蒼訪昔遊內史舊山空日暮
南朝古木向人愁天香月色同僧室月落猿啼傍客舟
此去播遷明主意白雲何事欲相留

初聞貶謫續喜量移登于越亭贈鄭校書

青青草色滿江洲萬里傷心水自流
越鳥豈知南國遠江花獨向北人愁
生涯已逐滄浪去冤氣初逢渙汗收
何事還邀遷客醉春風日夜待歸舟

北歸入至安德界偶逢洛陽隣家李光宰

生涯心事已蹉跎舊路依然此重過
近北始知黃葉落向南空見白雲多
炎州日日人將老寒渚年來水自波
華髮相逢俱若是故園秋草復如何

自江西歸至舊任官舍贈袁贊府

却見同官喜復悲此生何幸有歸期
空庭客至逢搖落舊邑人稀經亂離
湘路來過迴雁處江城卧聽搗衣時
南方風土勞君問賈誼長沙豈不知

赴南中題褚少府湖上亭子

種田東郭傍春陂萬事無情把釣絲
綠竹故侵行徑裏青山常對捲簾時
紛紛花落門空閉寂寂鶯啼日更遲
從此別君千萬里白雲流水憶佳期

上巳日越中與鮑侍郎泛舟耶溪

蘭橈漫轉傍汀沙應接雲峰到若耶
舊浦滿來移渡口垂楊深處有人家
永和春色千年在曲水鄉心萬里賒
君見漁船時借問前洲幾路入煙花

雙峰下哭故人李宥

憐君孤壠寄雙峰埋骨窮泉復幾重
白露空沾九原草青山獨閉數株松
圖書經亂知何在妻子因貧失所從
惆悵東臯却歸去人間無處更相逢

使次安陸寄友人

新年草色遠萋萋
久客將歸失路蹊
暮雨不知湏口處
春風只到穆陵西
孤城盡日空花落
三戶無人自鳥啼
君在江南相憶否
門前五柳幾枝低

自夏口至鸚鵡洲夕望岳陽寄阮中丞

汀洲無浪復無煙
楚客相思益渺然
漢口夕陽斜度鳥
洞庭秋水遠連天
孤城背嶺寒吹角
獨戍臨江夜泊船
賈誼上書憂漢室
長沙謫去古今憐

別嚴士元

春風倚棹閣閣城水國春寒陰復晴細雨濕衣者不見
閒花落地聽無聲日斜江上孤帆影草綠湖南萬里情
東道若逢相識問青袍今已誤儒生

避地江東留別淮南使院諸公

長安路絕鳥飛通萬里孤雲西復東舊業已應成茂草
餘生只是任飄蓬何辭舊物開秦鏡却使他人得楚弓
此去行持一竿竹等閒將狎釣魚翁

送台州李使君兼寄題國清寺

露冕新承明主恩山城別是武陵源
花間五馬時行縣竹外千峰常在門
晴江洲渚帶春草古寺杉松深暮猿
知到應真飛錫處因君一想已忘言

送孫逸歸廬山

廬峰絕頂楚雲銜楚客東歸棲此巖
彭蠡湖邊香橘柚潯陽郭外暗楓杉
青山不斷三湘道飛鳥空隨萬里帆
常愛此中多勝事新詩他日佇開緘

送馬秀才落第歸江南

南客懷歸鄉夢頻東門悵別柳條新殷勤斗酒城陰暮
蕩漾孤舟楚水春湘竹舊斑思帝子江離初綠怨騷人
憐君此去未得意陌上愁省淚滿巾

送常十九歸嵩少故林

迢迢此恨杳無涯楚澤嵩丘千里賒岐路別時驚一葉
雲林歸處憶三花秋天蒼翠寒飛雁古堞蕭條晚噪鴉
他日山中逢勝事桃源洞裏幾人家

送宇文遷明府赴洪州張觀察追攝豐城令

送君不復遠為心余亦扁舟湘水陰路逐山光何處盡
春隨草色向南深陳蕃待客應懸榻宓賤之官獨抱琴
儻見主人論謫宦爾來空有白頭吟

賦得

鶯啼燕語報新年馬邑龍沙路幾千家住層城臨漢苑
心隨明月到胡天機中錦字論長恨樓上花枝笑獨眠
為問元戎實車騎何時返旆勒燕然

上陽宮望幸

玉輦西巡久未還春光猶入上陽間萬木長承新雨露
千門空對舊河山深花寂寂宮城閉細草青青御路閒
獨見海雲飛不盡只應來去候龍顏

登潤州萬歲樓

高樓獨上思依依極浦遙山合翠微江客不堪頻北望
塞鴻何事又南飛丹陽古渡寒煙積瓜步空洲遠樹稀
聞道王師猶轉戰誰能談笑解重圍

送陸澧倉曹西上

長安此去欲何依
先達誰當薦陸機
日下鳳翔雙闕迴
雪中人去二陵稀
舟從故里難移棹
家住寒塘獨掩扉
臨水自傷流落久
贈君空有淚沾衣

送柳使君赴袁州

宜陽出守新恩至
京口因家始願違
五柳閉門高士去
三苗按節遠人歸
月明江路聞猿斷
花暗山城見吏稀
惟有郡齋窗裏岫
朝朝空對謝玄暉

江州重別薛六柳八二員外

生涯豈料承優詔
世事空知學醉歌
江上月明胡雁過
淮南木落楚山多
寄身且喜滄洲近
顧影無如白髮何
今日龍鍾人共棄
愧君猶遣慎風波

青溪口送人歸岳州

洞庭何處雁南飛
江蒹蒼蒼客去稀
帆帶夕陽千里沒
天連秋水一人歸
黃花裛露開沙岸
白鳥銜魚上釣磯
岐路相逢無可贈
老年空有淚沾衣

送耿拾遺歸上都

若為天畔獨歸秦對水看山欲暮春窮海別離無限路
隔河征戰幾歸人長安萬里傳雙淚建德千峰寄一身
想到郵亭愁駐馬不堪西望見風塵

題靈祐和尚故居

歎逝翻悲有此身禪房寂寂見流塵多時行徑空秋草
幾日浮生哭故人風竹自吟遙入磬雨花隨淚共沾巾
殘經窗下依然在憶得山中問許詢

尋龍井楊老

柴門草舍絕風塵空谷耕田學子真
泉咽恐勞經隴底
山深不覺有秦人手栽松樹蒼蒼老
身卧桃園寂寂春
惟有胡麻當雞黍白雲來往未嫌貧

逢雪宿芙蓉山主人

日暮蒼山遠天寒白屋貧
柴門聞犬吠風雪夜歸人

贈秦系徵君

羣公誰讓位五柳獨知貧
惆悵青山路烟霞老此人

湘妃

帝子不可見秋風來暮思嬋娟湘江月千載空蛾眉

春草宮懷古

君王不可見芳草舊宮春猶帶羅裙色青青向楚人

正朝覽鏡作

憔悴逢新歲茅扉見舊春朝來明鏡裏不忍白頭人

送子婿崔貢甫李穆往揚州二首

渡口發梅花山中動泉脉蕪城春草生君作揚州客
雁還空渚在人去落潮翻臨水獨揮手殘陽歸掩門

寄龍山道士許法稜

悠悠白雲裏獨住青山客
林下晝焚香桂花同寂寂

送方外上人

孤雲將野鶴豈向人間住
莫買沃州山時人已知處

送靈澈上人

蒼蒼竹林寺杳杳鐘聲晚
荷笠帶斜陽青山獨歸遠

茱萸灣北答崔載華問

荒涼野店絕迢遞人烟遠
蒼蒼古木中多是隋家苑

七里灘重送

秋江渺渺水空波
越客孤舟欲榜歌
手折衰楊悲老大
故人零落已無多

家園瓜熟是故蕭相公所遺瓜種
悽然感舊因賦此詩

事去人亡跡自留
黃花綠蒂不勝愁
誰能更向青門外
秋草茫茫覓故侯

重送裴郎中貶古州

猿啼客散暮江頭
人自傷心水自流
同作逐臣君更遠
青山萬里一孤舟

尋盛禪師蘭若

秋草黃花覆古阡
隔林何處起人煙
山僧獨在山中老
惟有寒松見少年

寄許尊師

獨上雲梯入翠微
蒙蒙烟雪映巖扉
世人知在中峰裏
遙禮青山恨不歸

酬李穆見寄

孤舟相訪至天涯，萬轉雲山路更賒。
欲掃柴門迎遠客，青苔黃葉滿貧家。

寄別朱拾遺

天書遠召滄浪客，幾度臨歧病未能。
江海茫茫春欲徧，行人一騎發金陵。

贈秦系

向風長嘯戴紗巾，野鶴由來不可親。
明日東歸變名姓，

五湖烟水覓何人

過鄭山人所居

寂寂孤鶯啼杏園
寥寥一天吠桃源
落花芳草無尋處
萬壑千峰獨閉門

瓜洲驛重送梁郎中赴吉州

渺渺雲山去幾重
依依獨聽廣陵鐘
明朝借問南來客
五馬雙旌何處逢

新息道中作

蕭條獨向汝南行
客路多逢漢騎營
古木蒼蒼離亂後
幾家同住一孤城

送李判官之潤州行營

萬里辭家事
鼓輦金陵驛
路楚雲西江春
不肯留歸客
草色青青送馬蹄

昭陽曲

昨夜承恩宿未央
羅衣猶帶御爐香
芙蓉帳小雲屏暗
楊柳風多水殿涼

秦系

字公緒
會稽人

山中贈張正則評事

終年常避喧
師事五千言
流水閒過院
春風與閉門
山容邀上客
桂實落華軒
莫強教余起
微官不足論

題鏡湖野老所居

湖裏尋君去
樵風往返吹
樹喧巢鳥出
路細葑田移
漚芡成魚網
枯根斷酒卮
老年惟自適
生事任羣兒

春日閒居二首

一似桃源隱將令過客迷礙冠門柳長驚夢院鶯啼澆
藥泉流細圍碁日影低舉家無外事共愛草萋萋

寂寂池亭裏軒窗間綠苔遊魚牽荇沒戲鳥踏花催小
徑僧尋去高峰鹿下來中年曾屢辟多病復遲迴

秋日過僧惟則故院

衰草經行處微燈舊道場門人失譚柄野鳥上禪牀科
斗書猶古旃檀鉢自香今朝數行淚却灑約公房

題茅山李尊師山居

天師百歲少兒童不到山中竟不逢洗藥每臨新瀑水
步虛時上最高峰籬間五月留殘雪座右千年磨老松
此去人寰今遠近回看雲壑一重重

題章野人山居

帶郭茅亭詩興饒回看一曲倚危橋門前山色能深淺
壁上湖光自動搖閒花散落填書帙戲鳥低飛礙柳條
向此隱來經幾載如今已是漢家朝

寄浙東皇甫中丞

閒閒麋鹿或相隨一兩年來鬢欲衰
琴硯共依春酒甕
雲霞輕覆破柴籬
註書不向時流說
種藥空令道者知
久帶紗巾仍藉草
山中那得見朝儀

張建封大夫奏系為校書郎因寄此作

久是烟霞客
潭深釣得魚
不知芸閣上
遺校幾多書

秋日送僧志幽歸山寺

禪室繩牀在翠微
松間荷笠一僧歸
磬聲寂歷宜秋夜
手冷燈前補衲衣

題僧明惠房

簷前朝暮雨添花八十真僧飭一麻入定幾時將出定
不知巢燕污袈裟



石倉歷代詩選卷四十八